



Province of the
EASTERN CAPE
EDUCATION

**NATIONAL
SENIOR CERTIFICATE**

IBANGA 12

SEPTEMBER 2011

ISIXHOSA ULWIMI LOKUQALA OLONGEZELELWEYO(FAL) – P2

AMANQAKU: 70

IXESHA: 2 iiyure



Olu viwo lunamaphepha angama – 21.

IMIYALELO NENGCACISO

1. Nceda ufunde eli phepha ngenyameko phambi kokuba uphendule imibuzo.
2. Sukuzama ukufunda lonke iphepha. Yiya kwisiquqatho kwiphepha elilandelayo uze uphawule amanani asetwe kwiincwadi ozifundileyo kulo nyaka. Emva koko, funda le mibuzo uze ukhethe ofuna ukuyiphendula.
3. eli phepha linamaCANDELO amaNE

ICANDELO A:	Inoveli	(35)
ICANDELO B:	Idrama	(35)
ICANDELO C:	Amabali amafutshane	(35)
ICANDELO D:	Isihobe	(35)
4. Landela imiyalelo ngononophelo ekuqaleni kweCandelo ngalinye.
5. Phendula IMIBUZO EMIBINI iyonke: umbuzo omNYE okhethwe nakwawaphi amacandelo amaBINI. Sebenzisa uluhlu lokukhangela ukukunceda.
6. Bhala iimpendulo zakho ngokuchanekileyo ngokwendlela yokunombola esetyenzisiweyo kwiphepha lemibuzo.
7. Qala iCandelo ngalinye kwiphepha ELITSHA.
8. Bhala ngokucecekileyo nangokucacileyo.
9. Ingcebiso yokulawula ixesha: sebenzisa imizuzu engama-60 kwiCandelo ngalinye olikhethileyo.
10. Umthamo wempendulo mawulawulwe linani lamanqaku.

IPHEPHA LESIQUATHO**ICANDELO A: INOVELI**

Phendula umbuzo ube MNYE kweli Candelo.

Eli phepha liza kunceda abafundi bakwazi ukukhetha imibuzo abafuna ukuyiphendula ngaphandle kokufunda lonke iphepha.

INANI LOMBUZO	UMBULO	AMANQAKU
1 (KUSA KUSIHLWA)	Umbuzo Omde OKANYE	35
2 (KUSA KUSIHLWA)	Umbuzo Omfutshane OKANYE	35
3 (UMQOL'UPHANDLE)	Umbuzo Omde OKANYE	35
4 (UMQOL'UPHANDLE)	Umbuzo Omfutshane	35

ICANDELO B: IDRAMA

Phendula umbuzo ube MNYE kweli Candelo.

5 (NDIYEKENI)	Umbuzo Omde OKANYE	35
6 (NDIYEKENI)	Umbuzo omfutshane	35

ICANDELO C: AMABALI AMAFUTSHANE

Phendula umbuzo ube MNYE kweli Candelo.

7 (NDAKUYICEL'IVUTHIWE)	Umbuzo Omde OKANYE	35
8 (NDAKUYICEL'IVUTHIWE)	Umbuzo Omfutshane	35

ICANDELO D: ISIOBE

Phendula nayiphi imibuzo emiBINI kweli Candelo.

9 (FUNZELA ENZULWINI)	Umbuzo omfutshane OKANYE	17½
10 (IBHABHATHANE)	Umbuzo omfutshane OKANYE	17½
11 (INTABA KANDODA)	Umbuzo omfutshane OKANYE	17½
12 (AMASELE PHEZU KODONGA)	Umbuzo omfutshane	17½

ULUHLU LOKUKHANGELA

ICANDELO	AMANANI EMIBUZO	INANI LEMIBUZO EPHENDULWAYO	PHAWULA
A: Inoveli (Umbuzo omde OKANYE Umbuzo omfutshane)	1 - 4	1	
OKANYE			
B: Idrama (Umbuzo omde OKANYE Umbuzo omfutshane)	5 - 6	1	
OKANYE			
C: Amabali amafutshane (Umbuzo omde OKANYE Umbuzo omfutshane)	7 - 8	1	
OKANYE			
D: Isihobe	9 - 12	1	

ICANDELO A: INOVELI**UMBUZO 1 (UMBUZO OMDE)****KUSA KUSIHLWA – KS Bongela**

Isifo samagxa sika Nomakhwezi singunobangela wombhodamo owenzekileyo emzini wakhe. Khawungqine le ntetho ungqiyame kakhulu kwindlela ebeziphethe ngayo engafuni kumamela ngebisiso zamntu.

[35]**OKANYE****UMBUZO 2****KUSA KUSIHLWA (INOVELI NAMANQAKWANA): K.S. BONGELA**

Funda ezi zicatshulwa zilandelayo uze wandule ukuphendula imibuzo.

- 2.1 Yaba ngundaba-mlonyeni kumfundi nakumfundisi-ntsapho into yokuphuncuka kukaMpumelelo ematyaleni. lintetho zawa ngokuwa. Abaninzi yabothusa le nto banexhala lokuba abasemagunyeni abasayi kubonakalisa lusini ngesi senzo, koko baya kumgxotha uMpumelelo. Abanye bayithatha njengento engenamsebenzi ukubaleka xa usoyika uswazi. Kakade inkwenkwe kwaXhosa izinika amathafa xa kukubi.

- 2.1.1 Kwenzeka phi oku kungentla? (1)
- 2.1.2 Lityala lantoni eli lixoxwa apha? (2)
- 2.1.3 Ngokwazi kwakho ibali ingaba uMpumelelo wayenolwazi ngeli tyala? Chaza. (3)
- 2.1.4 Sitheni isigwebo asinikiweyo uMpumelelo kweli tyala? (2)
- 2.1.5 Nika intsingiselo yeli binzana, “yayingundaba-mlonyeni”. (2)

- 2.1.6 Kuthetha ukuthini ukungabonakalisi lusini? (2)
- 2.1.7 Ucinga ukuba ilungile into yokohlwaywa komntwana xa emoshile? (2)
- 2.1.8 Ewe/Hayi. Xhasa impendulo yakho. (2)
- 2.1.8 Nika igama eliqhelekileyo onokulisebenzisa endaweni yelo likamfundisi-ntsapho. (1)

[15]

2.2 Baninzi abayiphawula into yokuba le nkosikazi inesifo samagxa esigqibeleleyo kwaye ayinaliso lihle kwabanye abantu. Bayithetha abaselokishini yada yaya kufika nakuNozililo. Wayenyevula emacaleni ehleba kwalo mhlobo wakhe esithi uzenza bhetele ngabantwana babantu kuba esuke wazibona selenevenkile abayifumana ngamaqhinga, “Kodwa unyaka mnye ngulo”. Seleda anyevulele abantwana babantu nje xa engubani yena? Uyazi ukuba uze kuzenza bhetele kulo Mlazi.

- 2.2.1 Nika igama lomntu ekuthethwa ngaye kulo mhlomlo. (1)
- 2.2.2 Ngonjani umntu ekuthiwa unesifo samagxa? (2)
- 2.2.3 Ngubani lo Nozililo? Mchaze. (3)
- 2.2.4 Uyifumene njani ke le venkile lo mntu kuthethwa ngaye? (2)
- 2.2.5 Nika igama lomyeni walo mntu umchaze ngasentla. (1)
- 2.2.6 Sinjani isimo somntu onyevulayo: Wonwabile okanye ucaphukile. Khetha impendulo ibenye echanekileyo. (1)
- 2.2.7 Caphula ibinzana elibonisa ukuba lomntu wayengabaginyi kakuhle abanye abantu. (2)
- 2.2.8 Umntu ohlebayo kuthiwa ngumntu ongenas... (Gqibezela) (1)

[13]

2.3 Ukuza kuthi xhaxhe kwesi sithuba besekuqengqeleke iinyanga ezininzi kakhulu ukususela oko uyise kaMpumelelo wangena kulo msebenzi mtsha wokujikeleza ufuna amalungu okuqinisekisa ngobomi bawo.

Wakumkhangela ngeliso lo mfo ubunokuphawula ukuba ngathi noko ezi ngcinga anazo ngalo mzi wakhe azimenzi nto ncam kuba usuke wayimbishimbishi ngenxa yesisu esikhulu nesiqu, into ekufaneleka ngathi yayidalelwe kwimpahla yasemlungwini.

- 2.3.1 Ebesebenza kumzi wantoni uLungile ngaphambili? (1)
- 2.3.2 Sithini isizathu sokushiya umsebenzi wakhe wangaphambili? (2)
- 2.3.3 Ngoku usebenza kumzi wantoni? (1)
- 2.3.4 Zingcinga zantoni ezi kuthiwa ebengaziva? (2)
- 2.3.5 Nika isithethantonye segama, “imbishimbishi” (1)

[7]**[35]****OKANYE**

UMBUZO 3 (UMBUZO OMDE)**UMQOL'UPHANDLE - PM Ngani**

“Zivakala umhla nezolo indaba zokugwetywa kwabantu bengenatyala, ivele lonto emva kweminyaka bethothoza eziseleni abanye sebaxhonywa kulo mazwe asenawo lo mthetho wentambo”. Ngqina oku uveza imposiso azenzileyo uLinda nayo neyiphina into ibinokwenza ukuba limlahle ityala aphele egwetywa.

[35]**OKANYE****UMBUZO 4 (UMBUZO OMFUTSHANE)****UMQOL'UPHANDLE – PM Ngani**

4.1 Funda ezi zicatshulwa zilandelayo uze wandule ukuphendula imibuzo.

“Khumbula kaloku, Eddie: uLinda ngumntu wakho. Ngoko ke ndiyamhlonipha ngentw'enye kubantu bakho bonke yena unengeji yakho. Izinto ezifana nathi zibambise nje apha kuwe. Apho kuvuke uqhushululu – ibe ke asiloyiki nganto nalo – umntu oyakuthethelelwa lilizwe liphela, nguLinda. Ngoko ke, ndixolele, sithandwa”. “Arh maan Lulu” litshilo irhoboqwana elinguEddie, lincume kade: ULinda akayi eRio. Usisigulana apho akhoyo. Ufunyenwe yilaa ngqele uyaziyo nawe. Ngaphaya koko, undinike imvume yokuba ndiphume nawe. Dyakalashe ndini! Ucinga ukuba andiwazi la maqhokolo akho, Eddie? Yinto oyithatha phi leyo? Ucinga ukuba angathi uLinda enobukhwele obungaka athi phuma nam? “Funda nantsi incwadi yakhe,” watsho egibisela laa ncwadi wayeyifumene kuLinda emini. Kuthe cwaka uLulu efunda.

- 4.1.1 Nika igama elipheleleyo lalo mntu uncokola noEddie. (1)
- 4.1.2 Sithini isizathu sokuba uLulu amhloniphe kangaka uLinda? (1)
- 4.1.3 Caphula isivakalisi esichaza ukuba uLulu akakonqeni ukulwa. (1)
- 4.1.4 UEddie ucela ukuba baphume bayephi, baye kwenza ntoni apho? (2)
- 4.1.5 Kutheni ULulu embiza ngokuba ngudyakalashe nje uEddie? (2)
- 4.1.6 ULulu umazi uLinda engumntu onjani ngakwicala lokuthandana? (2)

[9]

4.2 Iziqithana zemihlaba ebiyelwe ngamatye aqatywe mhlophe, zazichumile ziintyantyambo zemibala ngemibala. Zawutsho umoya waloo ndawo wazala livumba elimnandi nelihlaziwayo. Yinto leyo eyatsho kwakho ifuthe lenzolo noxolo, negazi lakhe okaHlobo waliva lahlukile kwinto ebeliyiyo xa ebedlula imimango ephithizelayo yomaMekeni nomaTsolo. Elo futhe limtsho kwaphela noko kudubeka komzimba nengqondo, wayiva nentloko

ikhaphukhaphu kamnandi, iwulungele nawuphi na umthwalo angathi ayithwalise wona.

Uthe krwaqu ixesha esihlahleni. Iintsimbi zazisukela eyesibini, emva kwemini leyo. Akabanga salibazisa, wonda ngesango. Phezu kwalo ufike kukho umbhalo othe nkqampu, usithi- **EBHONGWENI**.

Indlela esinga kumnyango wangaphambili yayicacile kuba yayenziwe ngobuchule ngamatye agudisiweyo avele kancinci emhlabeni. Wahlabana ngayo, ejonge emnyango. Uthe seleza kunkqonkqoza, wemandlana nomfana equkeza esebenza phambi kwendlwana yokugcina imoto.

- 4.2.1 Yindlu kabani le kuthethwa ngayo? (1)
- 4.2.2 Umbhalo othi, “Ebhongweni” uchaza ntoni ngale ndlu? (2)
- 4.2.3 Yayiyintoni injongo yotyelelo lukaHlobo kule ndlu? Chaza. (2)
- 4.2.4 Ngubani lo mfana adibene naye apha, ebexakeke yintoni le ingaka? (2)
- 4.2.5 Yintoni le imenze okaHlobo waziva edlamkile? (1)
- 4.2.6 Nika intsingiselo yesifanekisozwi, unkqampu njengoko sisetyenzisiwe kwisicatshulwa. (1)
- 4.2.7 Yindawo enjani ekuthiwa sisiqithi, nika igama lesiqithi esidumileyo kakhulu apha eMzantsi Afrika. (2)
- 4.2.8 Chaza ukuba igama, “indlwana” lisetyenziswe ukubonakalisa ntoni kwesa sivakalisi? (1)

[12]

- 4.3 Ukuba ngujobela wedwa phakathi kwenyakanyaka yabafazi, kwivenkile yempahla yabafazi kuphela, yimeko eyamtsho okaHlobo ngenye intsasa wagubungeleka. Waqonda loo mini ukuba abafazi aba zizithanda – kwazi, abantu abangakwazi mpela ukuzigcinela iintakumba zabo, bayeke ezabanye. Bonke babemthe ntshoo ngalo mehlo athethayo, amehlo angathi anombuzo, “Ufuna ntoni apha uyindoda nje”?

Waba ngatshonela ngapha, ejonga nayiphi into ngomdla, balinde nje adlule kuyo, bayokungungelana bonke kuyo, akudlulela kwenye itafile, bamlandele. Abanye bade bazixhome, bazigqatse ngelithi bangamnceda ukuba unento emxakileyo afuna ukuncedwa ngayo. Waphawula ukuba ebethi akulala elo ncedo, izale indlu ngamahumhum kuthethwa ngaye, kusalathiswa ngaye.

Eyayicacile yeyokuba babemangalisiwe kukubona indoda engangaye iphengulula ngobuchule impahla yamabhinqa. (wayekumashumi amane ubudala-usokadala wokwenene)

- 4.3.1 Nika igama lale venkile wayeyihambe uDick. (1)
- 4.3.2 Yintoni eyamqhubela kule venkile umhlekezi lo? (2)
- 4.3.3 Nika igama leebhatyi zodidi oluphezulu ebezifumaneka kule venkile. (1)
- 4.3.4 Waphuma ekweyiphi imeko uDick kule venkile? Nika izizathu zempendulo yakho njengoko ulazi ibali. (2)
- 4.3.5 Caphula amazwi abonisa ukuba amehlo aba ayengasuki kuDick. (1)
- 4.3.6 Yintoni ujobela? Khetha ibenye echanekileyo kwezi zingezantsi.
- (i) Yindoda endala
 - (ii) Yintaka
 - (iii) Ngumntu ongekatsinati (1)
- 4.3.7 Chonga umgca apha kwisicatshulwa ochaza ukuba uDick lo ebengakatsinati noxa bekumele ukuba sele watshata. (1)
- 4.3.8 Kuthetha ukuthini ukuba, “umntu azigcinele iintakumba zakhe”? (2)
- 4.3.9 Ingaba ngokwasesiXhoseni ilungile into yokuba umntu obhinqileyo azithethelele kumntu oyindoda. Xhasa impendulo yakho. (3)

[14]**[35]**

ICANDELO B**UMBUZO 5 (UMBUZO OMDE)****NDIYEKENI: D M JONGILANGA**

Funda ezi zicatshulwa zilandelayo wandule uphendule imibuzo.

“Isenzo esibi esenziwe nguMnumzana Ndila sokunxila esikolweni aphinde athume abantwana utywala ngexesha lesikolo siwubeka ibala elimdaka umsebenzi weetitshala nezo zingenaso esi sono”

Ngqina olu luvo ubonisa ubungozi besisenzo.

[35]**UMBUZO 6 (UMBUZO OMFUTSHANE)****NDIYEKENI: D M JONGILANGA**

6.1 Zanele: Funeka, my sister, ndalamile, ndixakwe nje yinto yokuba lo mfo ngunomgcana, ndingathandi ukuba makaqhelane nokunxanwa.

Funeka: Kulunge kanye oonomgcana abo kanye, akuqondi.

Zanele: Njani?

Funeka: Bona sebeqhele ukubotshelwa esinqeni. Kulula ke ukungena kwabo edyokhweni kunokuleqana nabangaphenjelwayo. Qond' apha dade, ukuba lo mfo akanxanwa ligqolo elo. Oonxanwayo ngootiki-ziyavuza, iindlezana sana. Buza kum.

- 6.1.1 Kukuthini ukwalama? (2)
- 6.1.2 Ngonjani umntu obizwa ngokuba ngunomgcana? (2)
- 6.1.3 Nika igama lalomntu kuthiwa ngunomgcana kulo mhlomlo ungentla. (1)
- 6.1.4 Cacisa le ntetho ukuba ithetha ukuthini: (1)
Oonxanwayo ngootiki-ziyavuza.
- 6.1.5 Umntu oligqolo ngumntu (onemali eninzi/ogcisayo ngemali).Khetha impendulo echanekileyo kwezi zikwizibiyeli. (1)
- 6.1.6 Kutheni uZanele engafuni asele lo mntu kuthethwa ngaye. Cacisa. (2)
- 6.1.7 Caphula umgca obonisa ukuba uFuneka unamava ale nto athetha ngayo yokuba kulunge kanye abo baselayo. (1)
- 6.1.8 Nika isichasi segama, “ukuphemba”. (1)
- 6.1.9 Chaza umahluko phakathi kwegama **umdlezana**, **nendlezana** ngamazwi alula. (2)

[13]

- 6.2 Funeka : Yazola imini yeemini. Uhleli uZanele?
 Zanele : Kudala ndihleli into kunayo ndibambe eshushu intlanganiso.
 Funeka : Ulumke ungazisikeli engatheni, hleze linqume ukuba akuyi kucwaya yonke into.
 Zanele : Yakungena intaka endlwini ayibuyi lubuyayo.
 Funeka : Mawo! Intlwa ayibanjwa ngentloko isavela. Buza kuthi bhabha. Namhlanje le ndlu kufuneka ilungiselelwe ukufika kokumkani. Impahla mayime ngolunye uhlobo.
 Zanele : O! nkosi yam! Ndinga andingezinikezeli elubala.
- 6.2.1 Ngubani esi sithethi kwaba babini kuza kube kuvuyiswana naso ngale mini? (1)
- 6.2.2 Oku kwenzeka kweyiphi ingingqi okanye i-Unit phaya eMdantsane. (1)
- 6.2.3 Nika igama lo mntu naye ebelindelwe ngamehlo abomvu kweli theko, iyintoni isizathu soko? (2)
- 6.2.4 Cacisa ngamazwi alula oku kucatshulwe kulo mhlomlo.
- (a) “Ndhleli into kunayo ndibambe eshushu intlanganiso.” (1)
- (b) “Ulumke ungazisikeli engatheni.” (2)
- 6.2.5 Lo kuvuyiswana naye kuvuyiswana naye kuba etheni? (1)
- 6.2.6 Kutheni uZanele engafuni ukuzinikezela nje kulo mfo? (2)
- 6.2.7 Lo kuthethwa ngaye ulindelweyo kutheni ebizwa ukumkani? (2)

[12]

- 6.3 Tshatisa intetho okanye amazwi omlinganiswa akuKHOLAM A nomlinganiswa ochanekileyo kuKHOLAM B. Bhala kuphela inombolo nonobumba ofanelekileyo.

KHOLAM A	KHOLAM B
6.3.1 Akukho mapolisa ayakukholelwa kwibali lokuba sifike efele apha lomntu.	A. Maziko
6.3.2 Papa ukuba ndinokuthi kuwe ndizele neqhiya enamasondo asixhenxe ungathini?	B. Njobe
3.6.3 Xa kunjalo ke yazi ukuba amatwina ayahlutshezwa.	C. Nomawele
6.3.4 Amehlo am awagqobhozi kuwe Zan kuya kubanjalo de kufiwe.	D. Funeka
6.3.5 Usandibamba imali yestraight nangoku.	E. Zanele
6.3.6 Isiduko sakhe nguDuka, uGqugqu.	F. Thulethu
6.3.7 Size apha ngophando lokusweleka komyeni wakho.	G. Ray
6.3.8 Zange silale ngobusuku phambi kobusuku asweleke ngabo utitshala.	H. Nomadinga
6.3.9 Omnye wabahlobo bakaThandiwe Loni.	I. Mawonga
6.3.10 Mfo kabawo, usapho lwakho uluhlalise nyembezana.	J. Madala

[10]

ICANDELO C: AMABALI AMAFUTSHANE

NDAKUYICEL'IVUTHIWE: – LL Ngewu & EZ Guqa

UMBUZO 7 (UMBUZO OMDE)

Liyinyani eli lithi, “Umntu akalahlwa”. Xoxa kuvokothetheke ungqina le ntetho ucaphula kakhulu kwibalana olifundileyo elinesi sihloko sichaziweyo, kwincwadana yakho yamabalana, uNdakuyicel'ivuthiwe.

[35]

OKANYE

UMBUZO 8 (UMBUZO OMFUTSHANE)**NDAKUYICEL'IVUTHIWE – LL Ngewu & EZ Guqa**

Funda ezi zicatshulwa zilandelayo wandule uphendule imibuzo.

8.1 Kuse ngosuku olulandelayo umfana wasesiKhobeni elishiya ngemva ikhaya lakhe engaqinisekanga naye ukuba wolifumanaphi ihlathi anokuzimela kulo. Ubefunjathiswe ubugcwabalalana bemalana enokumgcina iintsukwana ngumfazi wasemaCirheni. Ufumene izithuthi ezimthwale wada waya kuwa eRhini kanti nalapho ugqithele ngaphambilana wada waya kuwa kwilokishi yakwaNonkqubela eMnyameni. Ufike apha wacela ukuxhwarha kumzi othile ngelithi uhamba ekhangela izithuba zomsebenzi. Wamkelwe kweli khaya ngezandla ezishushu kuba abantu baseMnyameni badume ngokuzibuka iindwendwe. Ufumene umsebenzi kwenye yevenkile zalapho eMnyameni kodwa akathathanga thuba lide kuba abantu bakwaNonkqubela bakhawuleze bambona ukuba akasiyiyo le nto bayilindeleyo emntwini ozingca nozigabasa ngobudoda. Bamndulule ngoxolo bemcebisa ukuba makakhe agqithele phambilana. Umke entywizisa iinyembezi ethethela phantsi esithi, “Kanti andizenzanga”.

- 8.1.1 Ngubani lo kuthethwa ngaye? (1)
- 8.1.2 Cacisa ngamazwi alula, “ubefunjathiswe ubugcwabalalana bemali”. (2)
- 8.1.3 Kukuthini ukwamkelwa ngezishushu? (2)
- 8.1.4 Sithini isizathu sokushiya kwakhe ikhaya lo mlinganiswa kuthethwa ngaye kwisicatshulwa? (2)
- 8.1.5 Ungaziva njani xa inganguwe lo ukule meko yalo mlinganiswa? (2)
- 8.1.6 Yintoni le bebesaziwa ngayo abantu baseMnyameni? (1)
- 8.1.7 Chonga isivakalisi esibonakalisa ukuba lo kuthethwa ngaye wayengonwabanga. (1)
- 8.1.8 Umntu ozingcayo ngumntu otheni. Khetha impendulo kwezi:
 - (i) Ukhululekile
 - (ii) Uyazidla
 - (iii) Ungcathu (1)
- 8.1.9 Lo uthethayo uthetha ukuthini xa esithi, “Kanti andizenzanga”. Chaza (3)
- 8.1.10 Kukuthini ukuxhwarha? (2)
- 8.1.11 Nika noluphi na uhlobo lwesithuthi ocinga ukuba walusebenzisa ukufika kule ndawo afikele kuyo. (1)

[18]

8.2 Ingqwayizile ukuphuma le ntwazana enkundleni icuntsula kanobom kule nto yabantwana izintama ubuntwana bayo ngokwenza oko. Umntu obukeleyo uqondile ukuba eli iza kuba lityala ngobutyala balo. Ibikho nentatheli yephepha-ndaba ebiqondele phantsi kuqondakala kakuhle ukuba ikhethwe yakhutshwa ngokuthenjwa ngenxa yobungcali bokukwazi ukuqokelela kwanto kwinto efana neli tyala.

- 8.2.1 Ibinjani intliziyo yalo kuthethwa ngaye? Caphula apha kwisicatshulwa amagama achaza oko. (3)
- 8.2.2 Ibilityala lantoni eli? (1)
- 8.2.3 Nika isithetha ntonye segama “**Intatheli**”. (1)
- 8.2.4 Ngubani umtshutshisi obechophele eli tyala, wayedume ngantoni? (2)
- 8.2.5 Sithini isizathu sokuchotshelwa kweli tyala ngumantyi osele emdala? (2)
- 8.2.6 Igqwetha lalinophawu olufanayo nelo mmangalelwa, loluphi olu phawu, ucinga ukuba yintoni isizathu soko? (3)
- 8.2.7 Sitheni isiphelo seli tyala? (1)
- 8.2.8 Nika izizathu eziBINI ocinga ukuba zibe negalelo kwisigwebo seli tyala ezichaphazela ummangali. (4)

[17]

[35]

OKANYE

ICANDELO D: ISIHOBE**VUKANI MADODA KUSILE**

Phendula nayiphi imibuzo emiBINI.

UMBUZO 9 (UMBUZO OMFUTSHANE)

Funda lo mbongo ungezantsi uze wandule ukuphendula imibuzo elandelayo.

FUNZELA ENZULWINI

Lishushu idabi kumathafa obu bomi;
Kuqhum'amaqulo kuchachamb'umchiza;
Uxhob'ufohlel'umlisela nomthinjana,
Usilwa noSathana, usilwa nobumnyama.

5. Ayaxhaxh'amagwala, kuband'umchachazo.
Ubomi ngumzamo kosind'amakroti;
Ubomi ngumthwalo bufuna umqolo;
Umgomo um'mi ulind'umzingisi.
Ubomi lidabi lokulwa nomona

10. Iyathimbisi' inyama ayifuni kuthotyozwa,
Aying'ingaba lidini lokuzis'impumelelo,
Ayingi ingalinda ijonge inzaliseko.

Qina isibindi ukuze uphumelele.
Qul'uphethel'imini nobusuku bayo.

15. Qhekeza imichankcatho owele ngayo,
Ufunzel'enzulwini ungabuyi ngamva.

Mawuqaqambe umgomo phambi kwakho,
Uziquhiz'iimbophelelo ezikuqamangelayo,
Uyibeke nxamny'imithwalo ekudodobelayo;

20. Ulubaleke ngomonde ugqats'olukumeleyo.

Wofuman'abaninzi bengqengq'elungqamekweni,
Wofuman'iqela ligxampuz'emgxobhozweni.
Onke loo maqela akukhwebela kuwo;
Maz'ungawahoyi ufunzele enzulwini.

25. Ofun'igolide akaqhwayi emgqubeni,
Axel'isikhukhukazi sifun'imibungu.
Ozingela izilo uthabatha izagweba,
Avuke kwangonyezi abuye nofele.

- 30 Oswele umgomo ufana nemfama,
Uyaphumputheka akhubeka awe,
Abe ngumqobo kwabahamba ngendlela,
Kulahleke naye inkitha yezimathi.
35. Qubul'isikrweqe ulw'ubemagazana,
Ubomi ngumgudu, wovuzwa wakubila;
Umhlab'uyahlaba awufuni nkenenkene.
Amandl'oba ngawakho wakufunzele enzulwini.
40. Indlela ilucinya yaye ingumnqantsa;
Ifunyanwa ngamachule iint'eziwa ngamadolo,
Zicele amandla kuMenzi went' zonke.
Ongecala lakhe wofikelela enzulwini
- 9.1 Cacisa isihloko salo mbongo ngamazwi alula. (2)
- 9.2 Caphula umqolo kwistanza 1 oquka abo basakhulayo. (1)
- 9.3 Chaza le ntetho ngamazwi akho, 'ubomi ngumthwalo bufuna umqolo'. (2)
- 9.4 Ukhetho zandi olusetyenziswe kumgca 2 kwistanza 1 kuphuhlisa ntoni kulo mbongo? (2)
- 9.5 Kukuthini ukuqhiza? (½)
- 9.6 Ngonjani umntu onesibindi? (1)
- 9.7 Kumhlathi wesihlanu (kwistanza 5), chonga uze ubhale phantsi isivakalisi esalatha ukubizela kuwe. (2)
- 9.8 Nika isichasi segama, inkitha (istanza 8 umgca 4). (1)
- 9.9 Isicebisa ukuba masithini imbongi kwabo bantu bona seboyisakele? (2)
- 9.10 Ingaba yinyaniso okanye bubuxoki obu buthethwa kwezi zizivakalisi zilandelayo.
- (a) Ubomi bufuna ama-athalala abantu.
(b) Ebomini umntu udla ukubila kwebunzi lakhe. (2)
- 9.11 Chaza isizathu sokusetyenziswa konobumba omkhulu kwigama, uMenzi kumgca 39 kwistanza sokugqibela. (2)

UMBUZO 10

Funda lo mbongo ungezantsi uze wandule ukuphendula imibuzo elandelayo.

IBHABHATHANE

Nal'ibhabhathane libhabha-bhabha
 Sisinambuzan'esithand'ukudl'amacwaka.
 lintaka ziyatsholoza, iinyenzane zenz'inzwini,
 Kodwa lona lithe cwaka, alivakalelwa.

5. Phofu loo nto ayalathi kudakumba;
 Nditsho kuba nalo lindanda ngodlamko.
 Phakathi kwezityalo liman'ukuhlola-hlola.
 Amathafa namagcume ziindawo zalo.
 Obu buhle busisigubungelo somphefumlo wam.
10. Ngumahlal'ehleli ombejezelayo owanez'umxhelo.
 Abukhathalele busika, neqabak'incamile.
 linyantyambo zoyisiwe, wen'uzigqwesile.
 Nekhiwane lisadalele, alinakucel'umngeni,
 Kuba obalo bon'ubuhle bunempethu.

- | | | |
|------|---|-----|
| 10.1 | Ngumbongo mni lo ungentla? | (1) |
| 10.2 | Chonga isafobe esisetyenziswe ngumbhali kumhlathi wokuqala wandule ukuxela udidi lwaso. | (2) |
| 10.3 | Chaza le ntetho ngamazwi akho; Kodwa lona lithe cwaka, alivakalelwa. | (2) |
| 10.4 | Xa umbhali esithi, "Amathafa namagcume zindawo zalo" uthetha ukuthini? | (2) |
| 10.5 | Kukuthini ukudakumba? | (1) |
| 10.6 | Yakha isibizo usebenzisa igama, "ukuhlola". | (1) |
| 10.7 | Sebenzisa igama ukutsholoza unika intsingiselo engaphandle kule yombongo. | (1) |
| 10.8 | Yintoni ibhabhathane? Khetha kwezi mpendulo zingezantsi. | (½) |
| | 10.8.1 Sisilo | |
| | 10.8.2 Sisilwanyana esincinci | |
| | 10.8.3 Sisinambuzane | |
| 10.9 | Yintoni ikhiwane? Nika isaci nentsingiselo yaso esakhiwe kweli gama. | (2) |

- 10.10 Iqabaka ivame ukufumaneka ngaliphi ixesha enyakeni? (2)
- 10.11 Lunjani uvakalelo lwembongi kulo mbongo? Xhasa impendulo yakho ngokucaphula apha embongweni. (3)
[17½]

UMBUZO 11

Funda lo mbongo ungezantsi uze wandule ukuphendula imibuzo elandelayo.

INTABA KANDODA

Ngxatsho-o-o-o-ke, mzi wasemaXhoseni!
Ngxatsho-o-o-o-ke, hlanga lwakwaluhlanga!
Ndithetha nani, zidweshana namagqiyakazi.
Ndibhekisa nakuni, mlisela nomthinjana.

5. YiNtaba kaNdoda intaba yeentaba.
Yintab'encoph'isondele ezulwini.
Yintab'ezinyaswe ngamahlath'akwaHoho,
Inge ithozamel'ukuthandazel'imvula.
10. Kulapho kutsholoz'iintaka neenyamakazi,
Ngokungathi zidumis'uQamata ngesihomo;
Zimzukisa ngokudala le Ntaba kaNdoda;
Zimbamba ngazibini ngobukho nobunjani bayo.
15. Sinelunda isizwe sikaXhosa ngale ntaba.
Yintab'esiya kuqhayisa ngayo ezizweni.
Asinakuba manyonywana zisakuyikhankany'iintlanga,
Kuba yintab'engundoqo weembali zakwaRharhabe.
20. Ntabandini ukuba ubukhula ngendithetha ndophele.
Ndithi ngendityibela, ndityondyotha, ndityatyadula.
Ngendisithi khul'ud'ukhuluphale kodwa ungakhokhobi.
Ngendisithi khul'ud'ufike khon'ezulwini.
- Uthum 'izijoli zize kusidlele amathol'eendaba;
Zisibalisele ngezinto zalapho kwikhaya lolangazelelo;
Zisichazele ngezinto ezenzek'ezulwini;
Zisixelele ngamaXhos'ababalwe ngobomi baphakade.
25. Ngemihla yantlandlolo, nditsho mandulo,
Kwez'uRharhabe nehlokondiba labalandeli.
Bafika babek'ubilo kuyo le ntaba,
Bevela kwaPhalo, phesheya komlambo.

Babeqephuke kuGcaleka baziph'amathafa,
Kuba ezi nkunzi zazingooxholovane zombini.
Nangona zaziphuma kuPhalo, yena ncakasana,
Zingathandi ukukhonya buhlantini bunye.

45. Wamisa kule ntab'uRharhabe wavul'umlomo.
Wathetha ebhekisa kwiindwalutho ezazimlandele,
Wathi, "Madoda, kudala sixhinkxa, kwanele.
Eli likhaya lethu ukususela namhla."

- Ayembazel'iindlebe amaXhos'akowabo.
50. Ephambi kwawo waphinda wathetha kwakhona,
"Masakhe imizi apha, silime nokulima,
Kule mimandla erhangqe le Ntaba kaNdoda."

- Yatsho inkonyane yohlanga, ithole lomthonyama.
Latsho likhomb'izipheluk'eziphahl'iNtaba kaNdoda.
55. Kwathi kanti lisitsho nje lizifak'engozini.
Kumhla labon'inyoka ikhwel'emthini ingenanyawo.

- AmaLawu wayewaphath'emanjeni ngokumisa kule ntaba.
Lafilizwe ngesiquphe, kwanyathelwana ngoobhontsi.
Laphalala lisisantyalantyalala igazi, lafunxwa ngumhlaba.
60. Yagqoloda, yangqulwa indoda, yaya kwelemimoya.

Kwaba masikizi kuloo mfazwe ikuloo ntaba.
Kungekudala kwadilik'udonga kwicala lamaLawu.
AbaThwa bada bavus'umnyele, bangelelela.
Zanqoza kwakhona kuhlaselw'amaXhosa.

65. "Tsiha-a-a-a-a-a-a! izikhali zikaRharhabe!"
Watsho umXhosa egwaz'ephindelela.
Kwada kwacac'icala ovuthuzela ngakul'umoya.
Babalek'abaThwa, bayifulathela loo ntaba.

- Zahamba iintsuku, nditsho iintsuku ngeentsuku.
70. Zahamba iintsuku, izidumbu zithe gangalala.
Zahamba iintsuku, zada zabola zalilifa leempethu.
Zahamba iintsuku, abasindileyo bephefumla nzima.

- Baberhaxwa livumba lezidumbu zabo bafi.
75. Ndithi kwaba seso sankqange sefuqasi.
Ahlal'apho amathambo, eding'abangcwabi,
Kungekho xesha lakufihla, kumaxhaphetshu.

Kwigcudwana lamaLawu awasinda ngokulambisa,
URharhabe wadal'uxolo nocwangco, kwaxolelwana

80. Wananisa ngeenkomo ukuze azuz'umhlaba
Kwinzwakaz'eyayilawula, igama nguHoho.

Yintab'eyankcenkceshelwa ngegazi lamagorha
Awe kwimfazwe engenakulibalek' ezingqondweni.
Ngamagorh'awazenz'idini ngenxa yokuyithanda,

85. Le ntab'esisimakade, iNtaba kaNdoda.

Siya kuhlala siyizukisa le ntaba.
Siya kusoloko siqwanya sijong'encotsheni yayo.
UMdali makolul'isandla sokunene ayiphulule,
Ukuze imishologu namashwangusha ayityeshele.

90. Makube njalo.

- 11.1 Ikweliphi iphondo le Ntaba kaNdoda? (1)
- 11.2 Chonga isafobe esisetyenziswe ngumbhali kwistanza 2, wandule ukuxela udidi nenjongo yokusetyenziswa kwaso. (3)
- 11.3 Xa umbhali esithi, sinelunda isizwe sikaXhosa ngale ntaba, uthetha ukuthini? (2)
- 11.4 Ngonjani umntu omanyonywana? Khetha kwezi mpendulo
- A Odlamkileyo
B Ophoxakeleyo
C Owoneleyo (2)
- 11.5 Kukuthini, Ukudla amathol'eendaba? (2)
- 11.6 Nika amagama oonyana bakaPhalo abachazwe kulo mbongo. (2)
- 11.7 Sithini isizathu sokuba omnye alishiye ela kowabo? (2)
- 11.8 Chaza umahluko phakathi kwenkosi nekumkani. (2)
- 11.9 Ihlathi lakwaHoho, lithiywe ngomlawuli walo. Ewe/hayi. (1)
- 11.10 Inkomo xa ikhala kuthiwa iyakhonkotha okanye iyakhonya. Khetha impendulo echanekileyo. (1/2)

[17½]

UMBUZO 12

Funda lo mbongo ungezantsi uze wandule ukuphendula imibuzo elandelayo.

AMASELE PHEZU KODONGA

- Ewe, phezu kodonga lomlambo,
Bee dwadalala abomlambo.
Uphume ngendlu umzi kaSele,
Kwenziwa njalo xa konakele,
5. Kuboniswane ngezidla usapho.
- Ladum'ibandla kwahlokom'iindonga,
Kukhahlelw'inkonyana yohlanga,
Imbishimbishi enokukratsha,
Eyathetha ngeenyoka yampatsha,
10. Isith'iinyoka zibhejel'amasele.
- Yahlala phantsi sele igwintsa,
Umqal'ohlaza umfimfithisa.
Zagilan'induna ngezifuba,
Zathuthuzela inkosi yathula.
15. Kwee nzwanga kungekho nosebezayo.
- Vumbululu Xoxwazan'uNkonde,
Wathetha ephezu kwesikhondo;
"Asikagqibi minyakana simanyiwe.
Uyise kaYoli ugwintsiwe.
20. Ngamatatasholo amadoda akwaSele"
Avunduka amadoda aguguma.
Endumzela kwandila ugwaluma.
Kwalamla iNdun'enkulu uNdubule:
"Madoda inyaniso iyahlaba"
Masifunzeni saphela kulo mhlaba."
Vu phantsi iNduna kad'ibilinga.
Yancin'amehlo yang'iyacinga.
Kwee thu mrhutyululu werhamba,
Kwaqala mcebi-cebo ukusaba.
Yee zulumbele loo ndimbane.

- 12.1 Kuthiwa yintoni isele elikhulu? (1)
- 12.2 Cacisa okuthethwa ngumgca 3 kwisitanza sokuqala. (2)
- 12.3 Chonga isafobe esisetyenziswe kwisitanza 1 wakugqiba usichaze. (2)
- 12.4 Ngabazintoni abantu abakhahlelwayo eluntwini? (1)
- 12.5 Igama imbishimbishi linika owuphi umfanekiso ngqondweni likwaphuhlisa ntoni ngokwalapha embongweni. (3)
- 12.6 Nika igama le nyoka echaziweyo apha embongweni. (1½)
- 12.7 Yintoni indimbane? (1)
- 12.8 Kukuthini ukusaba? (1)
- 12.9 Xa umntu kusithiwa ugwintwe kuxa e : Khetha impendulo ibenye ngezantsi
- A ebulewe ngabantu abaninzi.
- B ebulewe angaziwa umbulali
- C ebulewe yinyoka. (1)
- 12.10 Nika igama elinikwa abantu abasondeleyo enkosini endaweni yelo le nduna elisetyenzisiweyo apha embongweni. (2)
- 12.11 Kuthiwa ngutata kabani lo ugwintweyo? (1)
- 12.12 Loluphi udidi lombongo olu lungentla? (2)

(17½)

[35]**AMANQAKU EWONKE: 70**